

淳祐玉峰志

玉峯志卷下

陽美凌萬頃

陳留邊實

古蹟

古先遺蹟在 有之疑以傳疑或至附會今攷其有  
所據者書之姑以存古

東城事具城門

嚮太師慧聚寺開山僧慧嚮也今石像在山半  
石室中扣之鏗然有聲俗訛為嚮太師  
龍柱事具寺觀門

慧聚寺大佛殿像及西偏小殿毗沙門天王  
像并左右侍立十餘神皆凜凜有生氣塑

工妙絕相傳為楊惠之所作又云張愛兒所作也龍圖閣學士徐林嘗嘆其妙而大殿三世佛已為庸僧妄加塗飾天王像綵色亦已故暗迺題殿壁云慧聚寺古塑天王予連日觀瞻徘徊不忍去二綵女尤勝絕與顧愷之畫相類按此寺成於大中年塑者得非楊惠之流乎今大像殿龍像再加綵畫古意已索然予懼無知者又將以脂澤污圭壁使唐人遺蹟掃地將嘆恨算及故書以志之初寺以此像及山半普賢像與涅槃圖為山中三絕淳熙寺焚殿閣皆燼惟普賢像為一僧背負而逃

慧聚寺殿前二樓曰經臺鐘臺扁皆李後主所題淳熙寺焚臺亦廢

高麗國進陰陽栢兩高總二三尺高宗以賜王綯二種於永懷寺殿庭之左右寺綯之審琦香火院也今栢高與殿齊每歲左花則右實右花則左實

淳熙間華亭縣居民浚河得一碑云天寶六年黃池縣令朱葬于崑山縣全吳鄉孔子宅之西南乃在華亭縣北七十五里海隅鄉華亭元屬崑山豈古全吳鄉廣於今耶今崑山全吳鄉無所謂孔宅姑存此以闕疑

晉劉徵率衆數十浮海入婁縣太尉郗鑒討平

之

隋大業國九年劉元進舉兵應楊玄感將渡江而玄感敗吳郡朱燮為崑山博士知天下將亂謀起兵赴者如歸自東陽至京口千餘里並受燮節制燮長不滿七尺涉獵經史微知兵畧云

唐武德中聞人遂安據崑山杜伏威使王雄誕擊之以崑山險隘難以力勝乃單騎造城下陳國威靈語以禍福遂安乃率諸將出降

唐光啓初劇賊剽崑山招討使周寶遣將張郁戍海上郁叛刺史王蘊不設備郁遂大掠蘊嬰城守寶遣兵討郁保常熟走海陵

淮將楊行密寇姑蘇別將秦裴屯崑山吳越將顧

全武擊裴園之裴援絕不降全武為檄諭之乃納款

### 土產

隋志載吳人務耕織以漁獵為業崑山為吳劇邑土地所宜蓋非一端舊經不載所產吳記止載石首魚今故類而志之

### 稻

紅蓮稻

米半有紅粒碓時紅粒先白其味甚香陸龜蒙別墅懷歸詩云近炊香稻識紅蓮則唐人已書此稻矣

再熟稻

田家遇豐歲苗根復蒸長旋復成實可掠取俗謂之再熟稻吳都賦云鄉貢再熟之稻

掠

香稻

傍湖用之種極難得尤香於紅蓮稻

烏野稻

雪裡揀

白野稻

稻翁揀

皆稻米之上色者

閃西風

趕麥長

軟得青

時裡白

六十日稻

百日稻

半夏稻

金成稻

皆稻米之早者

烏口稻

其殼色黑

稻米之最晚者

舜耕稻

翅有兩

烏粒稻

眼黑

睦州紅

杞種稻

榜裡稻

山烏稻

辦白稻

稻裡揀

紅蒙子

下馬看

皆稻米之常種者

趕陳糯

社交糯

皆糯米之早者

烏絲糯

閨女糯

金州糯

定陳糯

宣州糯

佛手糯

師姑糯

皆糯米之常種者

水族

石首魚

吳地記崑山縣石首魚冬化為鳧土人呼為鳧鴨小魚長五寸秋社化為黃雀食稻至冬還海復為魚

蟹

江湖間皆有之吳人所嗜相傳於稻登時其螯率執一穗以朝其魁然後從其所之早夜感沸指江而奔魚者綿簾承其流而障之曰斷得遜者奔紛月執以入于江則形質寔大漁者又斷而求之其得遜者遂入于海質蓋大然發風疾故皮日休詩云病中無用雙螯處陸龜蒙詩云葉孟應阻蟹螯香

河豚魚

凡近江皆有之有南江北江之別俗重北江者蓋取其肥春初得此魚則為盛焉世傳以為有毒反烏頭附于荆芥等諸風藥

田雞

即水蛙為脯饋遠方得者甚稱重之

食物



楊莊瓜

出縣西三里有仙人以瓜子遺村民種之花實俱小而味極甘東楊莊所種差大味不逮西楊莊者

菱

酉陽雜俎云四角三角曰菱兩角曰菱今腰菱多兩角又有野菱家菱二種近復出餽餽菱最佳腰菱遂不足道

棋麪

細僅一分其薄如紙可為遠方饋雖都人朝貴亦爭致之

藥物

蛇床子

在歲貢數

何首烏

楷冠子草

香

清遠香

旧嘗入貢

布帛

苧布

其細者如羅尤白士大夫用之為唐衣野服在歲貢數出縣南沙葛村細者可與紗敵遠方人謂之金絲布舊充聖節貢

黃沙布

葉班布

中祇裯褥以麻苧布皆可為之布碧  
而花白山水鳥獸樓臺士女之形如  
碑刻然

石

巧石

出馬鞍山後石工探穴得巧者斷  
取玲瓏植菖蒲芭蕉置水中好事  
者甚貴之他處名之曰崑山石亦  
爭來售然恐傷山脉鑿者有禁止  
安陳先生立碑在縣廳今間亦私  
取而得益可奇其名益重

右皆書其他邑之所无而此獨有者若  
如木之松栢獸之牛羊之類則地皆有  
之今故不載云

封爵

列爵分土古以賞功若後世之分封則有  
其名而无其祿特以顯職位之崇而已

今紀于左以示衣冠之盛而使來者則續

而書之

吳 見三國志

張昭 輔吳將軍

陸遜

皇朝

崑山縣開國侯

衛涇 端明僉樞兼參

崑山縣開國伯

崑山縣開國子

范之柔 礼部尚書

崑山縣開國男

衛涇 特左侍郎兼侍

鄭準 中奉大夫

鄭竦 奉直大夫轉朝議大夫

寺觀

邑有寺觀凡三十二附於郭者十七散於郊者十五起廢之

因則詳著其下

景德寺在縣西南二百五十步東晉咸和二年王珉捨宅為寺賜寶馬為名今寺東有王太守祠太守即珉也唐國一禪師道欽受業于此

皇朝景德三年勅改今額

慧聚寺在縣西北馬鞍山下梁天監十年有吳興沙門惠嚮嘗登山寓一石室可以禪息遂居之有二虎侍欲建寺未能忽有神人見於前曰請助千工用佐景福是夜風雷暴作暗鳴之聲人皆聞之達明殿基成矣延袤十七丈高丈有五尺<sup>二</sup>巨石轟然其直如矢非人力所能縣令以聞武帝命建寺封山神為大聖

山王賜慧聚寺為額仍賜鐵爐繡佛田二頃山  
一所木千株勅張僧繇繪神於兩壁畫龍於四柱  
每陰雨欲晦畫龍準、皆潤鱗甲欲動又勅僧繇  
畫鎖以制之會昌寺廢以柱藏郡中至宣宗  
大中間寺復興賜金書寺牌銅鐘郡復以柱  
還寺寺半疊石半為虛閣縹緲如仙府地  
山佛宇未有其比淳熙中寺焚凡殿柱雷火篆  
書及以來名賢題詠碑刻楊惠之所作天王  
像李後主所書扁額一藝無遺所存止山王  
廟至端平間寺廟俱再焚今復建大佛閣成  
於淳祐戊申之秋名神雄大運之閣今刑部侍  
郎樓治書寺多名公詩並見雜詠

## 唐王洮天王堂記

有釋氏子宅於馬鞍山下者一日忽扣太原王生洮促足角坐涵意欲洩不能者數四頃乃非曰欲以天王堂事勞筆端謹按釋氏書曰天生<sup>王</sup>於閬國作童兒猶能血鏃射妖遂去走天竺遇金仙子援記護閭浮提補多聞王騰雲跨漢鞍鬼撚魔霞幟雪戟捐勾摧泮竟鎮妙高比面水晶宮中為葉義官長呼奇怪事孔門弟子慚於語然儒以正直為神今天王能射妖摧魔用壯護世是六正直也復何慚之哉按馬鞍山踴出平原中絕頂晴望他山百餘里緣接培塿或溝穿塍織坦然鋪出復多奇石支疊

危柱釋氏築室鑿倚山丰今天王堂實翼西北隅  
塑狀岳聳屹柱空今精粹力溢膺腕磊卒象  
伍作為部落堂宇宏麗四簷飛翬麻靈庇  
像若被甲荷戈立於烟靄洵因勞其費進  
曰非某力能皆邑民為之塑成於張弘度堂成  
於俞吁大凡力於耕者一人切於穫者五人豈  
偁然於天王哉釋氏子姓闕號清建趙號良  
頡時唐大中三年月日鄉貢進士王兆立  
吳郡志載

蓋璵慧聚寺山圖序記

慧聚二剎之名剎肇跡於梁天監中耆舊互  
傳昔者法師慧嚮駐錫此地謀建塔廟力所

米給精切誠至俄有鬼神之助一夕雷電大作怒風  
惡雨明而視之宏基崛成殿之階是也觀其哀硯  
礪積欽嶽在蒼崖岡之垠直逾引繩方邁載  
剝剝鐫鏤了無癡痕隱隱隆頽然似巨鰲之俯  
伏不欹不跛背負柱石殫巧窮妙信非人力之可  
致是以自時厥後 奕蟬聯月增日崇底今大備寺  
之疆境據崑王之西北寶勢屹嶺依馬鞍山繚繞  
而上高七百丈茂林脩竹松檜藤蘿之隙又有靈  
苗佳卉玆蕨秀蔓自綠自紅霜霰弗凋佛宇僧室  
踈曠爽快之處蔽紅陰而翳綠影者綦布櫛比幾  
三千楹經畫締構工 乃若躋躡烟霞偃仰  
風月軒堂亭榭臺閣樓觀往橫跨傑出旁峙挺



立若鳥之翔如獸之蹲甚者架虛排空玲瓏縹  
緲層疊銀朱金壁之相耀乍顯乍晦于翠  
雲紫靄之顛加以巨海處其左重湖居其右俯  
瞰松江之洶湧側顧楊山之巔屹朝化暮變供秀  
氣而借清光指掌之間四望百里真天下雄壯奇偉  
之觀也然而姑蘇一隅地極僻側弗類乎杭之天空潤  
之金山當冠蓋之衝臨車航之會遂乃非凡之勝槩  
包蘊停蓄止見于近未見于遠量彼較此為之不  
平適在事僧法全刻圖于后踴躍執筆從而道其  
始末庶或流派傳之四方且俾好事者燕坐几席仿  
彿乎登朱橋步碧砌審衆水之環山想孤峯之擎  
峙必稱其洒落峻峭蔑一點埃壘之氣可以傳天

竺儼金山並駕而同馳靡分先後蓋六揚善成  
美之意也雖然摸之于畫述之于書寄象寓數  
特其糟粕殆有盡之書之莫窮算盡之妙潛  
藏默喻于象數之表觀者自得斯圖也豈獨  
誇詫是招提而已邪因以紀國家太平一百六十  
年之名神功聖德格于上下覆護函毓無垠無  
涯故茲山邑水鄉幽閒荒陋之地尚克闢紺舍四  
集緇徒為民祈福有如是居有如是景嗚呼休  
哉政和元年十一月旦日知縣事蓋 記

辨端慧寺聖迹記

至道二年冬端 自杭州奉送二卿琅琊王公歸  
闕路止于姑蘇郡太守尚書戶部員外郎陳公

頌為政有仁愛故四方之人籍籍有聲名者咸偕  
仰望爭欲奔走詣其館而識其面者衆矣端六  
既一見果若舊識乃盤桓于是邦得遊其屬邑  
三年春二月屆于崑山縣寓慧聚寺未數日會  
公聽理之暇出巡水塘相繼而至又得以陪從嘉賞  
周覽古跡且目其孤巒秀岬聳立天際曰馬鞍山  
也群岫相去皆百里而遠極頂四視東邊溟渤西  
接洞庭原隰溝塍坦然鋪著初至寺陞殿尋碑  
讀記厥石斷壞其文殘闕年月名氏皆蔑然也  
乃詢諸寺人有耆年宿齒者乃得唐人博陵崔  
子向所紀之文略叙其事先是梁天監十年有  
帝之門師吳興沙門釋惠嚮姓懷氏久居內

寺一旦歸省而至是山有息焉之志因放錫禪坐  
于山脇石室間以二虎為侍師乃運籌思立精舍  
忽有神人見師之前曰願施千工以成其事其  
夜風雷震吼林木號怒近山之人聞撲斫之聲  
翌日而奇石矗廣階駢城其方截如也延袤  
一十七丈高顯一十二尺蓋山王之役神工也時宰縣  
者異其事聞刺史奏武帝因造寺焉遂立正  
殿于其上勅張僧繇繪神于二壁圖龍于四柱  
每雲陰天暝則鱗甲皆潤凖然及有浮萍  
者或曰多興疾雷鼓巨浪於江海間後勅僧繇  
以制之之洎唐武帝會昌中詔毀天下佛宇茲  
寺嘗在閩閩大中五年宣宗黃帝重闡釋

門故寺僧清江以其靈迹聞郡守常公於是奏  
再興焉凡今殿閣像設非梁製也唯神砌存耳  
觀其神迹規制皆窮奇極壯造化所成信非人  
力遊者觀之莫不齟然心懾而股栗竄驚而魄  
駭苟非嚮師至德通于神明又疇克臻于是耶  
苟非山王靈威昭于有德又烏能成其迹耶又前  
後曾未有郡牧至此今陳公聞異來而觀之  
久已嘉嘆因謂端曰前記湮滅來者昧其  
所從請撫其實庶垂于永端雖謏才忝辱厚  
命故抽毫以書時至道三年孟夏

日記

薦嚴資福禪寺在縣東三百步梁開平三年置  
為崑山福院貞明五年三月重脩 皇朝大中  
祥符元年勅改惠嚴禪院後又勅改今額以奉  
成穆皇后香火移額於大光菴寺有高御書  
普照堂扁藏於御書閣法堂曾敗為記范石  
湖嘗讀書寺中屢有詩載大全集及雜詠其  
後石湖讀書處生紫藤縈蔓可愛名以范  
公藤名公各有賦詠

永懷報德禪院在縣西南二百步舊為景德  
寺普賢教院有諸天閣范浩為記後勅  
賜今額以奉顯恭皇后香火寺殿前有高麗  
栢詩見古跡門

新安尼寺在縣東二百步梁天監二年置唐會昌  
五年廢大中七年重置皇朝紹定寺火惟觀  
音像巋然於烈焰中今復興

惠嚴禪院在縣西南一里半隆興初建本名大  
光菴薦嚴寺改勅額移惠嚴之額於菴遂  
為禪院住僧如說重脩今頗潔雅

寶慶院在縣西三百步本逸野堂故基後歸邑人  
郁允恭允恭與其弟允文捨建十六觀堂成於  
寶慶年勅賜今額趙緜為記

華嚴教院在馬鞍山之東北慧聚寺子院有疊

浪軒詳見園亭門

利濟教院在縣南

九品觀堂在景德寺西其地本屠沽所聚忽寺僧師諒一夕夢有神人披髮執戈而告曰此地當作道場師何不究心興一觀堂名以九品鑿地為沼當有石塔出現寤而言之遂協力建觀掘地果得石塔數層上刻元幹僧師諒

東齋在馬鞍山東僧道川駐錫之地道川即頌金剛經者齋門有龍洲劉改之祠改之廬陵人以詩名于時客江湖死葬于東齋佛殿後今二鄉湯公嘗作文遣祭利于祠下

右並寺院之在邑者

聖像禪院在縣東南二十五里晉建興二年有迦葉維衛二石佛泛海逆水而來至今院基前止



數百人不能徙光采七晝夜佛書所謂吳中  
二佛即此里人趙罕捨所居以建院勅賜聖像  
為額梁貞明四年重修皇朝寶慶中寺焚  
晉梁以來碑刻並不存

延祥寺在縣東四十里梁天監中土人辛氏捨宅置  
為紹法寺後廢錢氏寶正中重置祥符元年  
勅改今額

隆福禪院在縣東三十六里梁天監中置為報  
恩院後廢唐天祐中重置皇朝大中祥符  
元年勅改今額

延福禪院在縣東南三十五里梁天監二年置  
五代梁開平二年重修皇朝大中祥符元年

勅改今額寺佛殿後有秦柱山詳見山門

無相禪院在縣東南四十里梁天監十年置為寶  
乘寺後廢唐天福二年重置皇朝大中祥符  
元年勅改今額院在沔川鄉地名石浦乃邑人  
衛涇所居嘗有相者惜院額無相兩字不利  
後衛涇果止參知政事遂符其言

廣孝寺在縣東北七十里唐咸通十四年置為  
懷讓寺後廢皇朝淳化中復置大中祥符三  
年賜今額

承慶薦福院在縣西柵三里本三里菴

能仁禪院在縣東南三十五里唐天祐二年置為  
羅漢院後唐長興二年重修改名德義院

皇朝大中祥符元年勅改今額

興福禪院在縣西南六十里唐大中十年置皇朝太平興國二年重修造佛殿後有趙陵山詳見山門

廣法教院在縣東三十六里

崇恩禪院在縣東五十里唐開成二年置皇朝

慶元二年重修

報德教院在縣東北九十里

右並寺院之在郊者

清真觀在縣北一里乾道七年道士翟守真來自天台募為真武道院至一小民家有老嫗緝麻於門坐樟木一段守真求焉老嫗以與之守

真挈歸加斧鑿而耳目口鼻之形隱然可考竟  
斲為像首由是道院始興淳熙初元夕常熟  
縣久廢女冠清真觀為額觀有昊天閣陳振  
為記

靈應普照觀在縣東北一里邑人翁謙嘗卜其  
地為穴兆鑿地得石函中有青圭由是建道  
院 寧宗御書今額及又書止堂扁賜主者  
易如剛今觀以名堂云

月華道院在縣西南卜山下

廣福道院在縣西

真聖道院在縣西南

靈祐道院在縣西南

右並道宮之在邑者

### 祠廟

有功德於民則當祀之而有禱輒應能福一方者雖爵號未正而血食滋久

有舉之不敢不載

惠應廟在縣西北三里馬鞍山下廟神乃山神元无氏名肖梁天監中役鬼工為慧嚮築慧聚寺大殿基一夕而成繇是勅封大聖山王 皇朝崇寧間方賜廟額大觀間封靜濟侯紹興間加永應淳熙間加昭德慶元間加顯貺開禧間改封昭惠公嫁嘉定間加靈濟寶慶間加福應紹定間加康祐封神妻為廣惠助順懿福昭德夫人侍御者朱某為靈佑將軍淳祐間

改封顯佑王夫人為叶靈妃自 皇朝以來遣中  
使降御香以祈嗣禱雨暘者凡六靈迹詳見廟  
記及誥詞廟經淳熙火不燬再經端平火廟燬  
像存嘉熙重建雄壯于昔 黃炳廟記

蓋聞三代迭號仁義攸歸七國僭稱簡瀆

謂或封建子弟或追贈公侯居于域中莫斯為  
大然有功于國有惠及民後世尊其道者亦受  
命無愧矣大聖山王者馬鞍山之神也按圖經茲  
山在縣西北隅平地崛起高數百尺屹然而獨  
立環望邈幾千里渺乎其無垠峯峦聳奇草  
樹增茂為邑中之勝槩大梁天監中有吳興  
沙門曰慧嚮者脫塵勞千劫脩菩薩萬行携

錫而至卜岩而居寂：一室安處其定慧耽：二獸馴擾其左右綿歷寒燠皆如始至向非達觀大士孰能 於此哉師嘗謂茲山殊勝可興佛寺雖用志彌篤而力莫能逮一日師方宴寢而山神前現曰願施千功以助斯意是夕雲驅電掣風號雷動駢闐之迹編于林莽鞭朴之聲震于岩谷恍惚中夜驚悸數里詰旦陰翳潛廓灵臺倏成雖疊石之相差若築出之夷廣橫袤十七丈高聳二丈小大規矩渾然削成其直如繩其平如砥非人工所能致也邑尹狀其事以聞乃於殿之東建神之像錫命曰大聖山王蓋旌其功而表其美也自茲以還威靈益著聰明正直鎮乎百里之境福善禍

淫庶乎一方之民凡猶豫者卜之如覈靈龜疾疫者  
禱之如餌良藥盼嚮之應昭而可驗旌幣之際  
紛而不絕及物之惠亦斯至矣然而年禩寢遠  
棟宇隳壞軒墀敝乎春草廊壁鳴乎秋蛩雖  
靈之具存而像六斯敝有邑人曰陳仁紹者好善  
不曰積財能散祇祠宇之棟橈思締構而鼎新  
今寺主僧志堅同募居民以成勝事僧願文清  
瑩者亦贊其能賤疏一發如石投水施利四來如  
川赴海凡所得者僅踰千緡於是鳩工市材揆日  
歲事歲時未易斤斧告停龍簷翬飛疊瓦駕  
壁窓牖明邃 赫奕殿堂廣其舊制廊廡闢  
乎新規門闌有闕左右有序中塑神像衛靈宮



威儀聿陳藻繪斯煥蓋所以荅神休而肅祀事也噫古之卿士有益於人者典禮尊其祀焉矧茲山王垂數百載而英烈不昧始施功而成善事終佑民而新明德建祠追號亦其宜矣前所謂有功於國有惠及民後世尊其道者受命无愧其斯之謂歟炳因訪舊胥臺簿遊是邑聞其異跡闕於記事旣蒙確請不獲牢讓辭旨淺近斯為愧焉時明道二年正月十五日

黃由誠應記

余遊上庠鄉之賢者不鄙其愚多延揖以訓子弟其寓是邑蓋再閱寒暑每當暇日樂於訪古獨古慧聚號為名刹山川之瑰勝堂殿之宏麗洞心

駭目常為終日留而不厭若夫嚮師之道力所格  
靜濟之神應無方聞之耆老相傳及現之碑誌不  
容言語贊嘆久矣故歲余蒙恩策名科級來歸  
之日親舊多臨顧迨今春少閒姓克往見復訪寺  
之上方則一時勝槩幾致煨燼所幸祠宇與佛殿  
獲存余私竊悵然叩之寺僧及大夫士言可復  
者故歲中秋後一夕有祝融回祿之警下視大殿  
終尋尺許風正西北其勢方張邑人咸集募施  
其力徒用嗟惋時邑大夫劉公實來蒞事公清正  
淳篤以儒術飾吏神人致喜者也奮然當火指  
神祠而告之曰昔者駕風霆雨雹之威驅鬼工  
以立厥址上棟下宇彌數百年神忍使為燔燬

一方其將仰烟焰未息公又禱曰茲為邑人植福之所今以釁致若不獲免願移之於今乞庇斯民言未既而風儼然轉為東南火就撲滅吁亦異矣夫神依人而行豈苟然者惟公誠信乎格幽明一致故獲應如嚮答神其可誣寺僧與鄉人賢者合詞曰願求記之以著其異且使知公愛民格神以誠獲應發於一言之頃曾不旋踵回視昔人反風已火之祥殆異世而同輒率是以往將臨大事建大節圖回經濟其不顧身以利天下天之所眷賚公殆未易量也余不得辭遂書以記其實公名藻字德清金華人以進士第繇官中都未字茲邑其政績之美才學之懿畧而不書其一一他可知已淳

熙九年清明後三日

卜將軍廟在縣西南卜山下嘗有人於廟下得斷碑畧  
云府君姓卜名珍字文超西河人也春秋六十有六以  
寶曆元年終葬于崑山西鹿城鄉界卜山礼也銘  
曰森古栢宛轉龍岡孤雲垂蓋日月懸光千秋  
萬古嗚呼夜長但不言將軍之號及莫詳廟食  
之始今墓誌不載廟中之碑乃流俗妄想附會不  
足取信

城隍廟在縣西南三十步廟前有檜甚古

東嶽廟在縣東南二百五十步

祠山廟在永懷寺內

五顯廟在新安寺內即婺源五顯靈觀大帝也邑人

自婺源奉香火歸將建祠卜地惟新安食遂立  
廟寺內嘗見衣冠五儒者徘徊月下及有見所  
乘青鹿跳躍於市

五通廟在縣東南三百步廟雖已廢今俗尚名  
其地為五郎堂前

孟尚書廟已見官宇門

鎮興霸典明王廟在縣東南二百五十步今為邑民所  
獲據舊有明王堂巷今併巷室之

六先生祠在縣學東廡淳令已酉權令吳堅建先是  
潘彙征作宰相時郡家奉朝旨令建六先生  
祠于學會事不果止繪於從祀弟子廡間至是  
始克成六先生者濂溪伊川明道晦菴橫渠南

軒

先賢祠在學西廡與六先生祠對淳祐己酉權令吳  
堅建先賢者陸龜蒙張方平范仲淹李衡

巫侯祠在縣學侯名似修嘉定間宰邑留意學校  
撤而新之故祠于學舊有張方平葉子強友  
文祠今皆廢獨此祠存

梓潼帝君祠在清真觀內

王太守祠在景德寺內詳見寺院門

張公廟在縣東南三里相傳所祀者張方平

嘗宰邑祠于學後廢邑人改祠于此水旱致卜

亦靈

吳明王廟在積善鄉

崑崙王廟在積善鄉

蔚遲恭廟在積善鄉蔚洲俗稱景雲大王廟  
地主明王廟在米塘鄉

巴王廟在米塘鄉巴城農人墾土得新碑云彭府  
君墓巴王墓南由是知廟下必有墓但不詳巴王  
為何時人

陸龜蒙廟在全吳鄉甫里

太祖明王廟在全吳鄉

吳王廟在泖川鄉度城

夏侯大王廟在武元鄉

闔閭大王廟在永安鄉金城

顧司徒廟在永安鄉

三林大王廟在永安鄉

五道明王廟在永安鄉

蘇王廟在湖川鄉

夫差王廟在新安鄉

虎存王廟在新安鄉

女媧聖姑廟在惠安鄉大駟媧婦山下

興德王廟在惠安鄉

吳司徒廟在惠安鄉

定海王蔣僕射廟在縣西北三里乾德五年錢

氏置

蘇將軍廟在縣西北三里

白將軍廟在縣西北三里



太祖靈跡王廟在縣西南二百一十步自定海王廟而下四廟皆舊經所載今詳其所

### 園亭

洛陽衣冠之所聚故多名園夜市菱藕春盤綺羅則足以見吳中遊適之盛凡園亭前後之興廢則不可不錄也

### 縣圖載官宇門

孫氏園在縣北馬先覺有詩見雜詠今廢

翁氏園在縣西吳仁傑嘗與陳壁賞木芙蓉有

詩見雜詠今廢

陳氏園在縣今廢

洪氏園在縣東今廢

衛氏園在石浦文節公後樂之地今子姪又各有園

不止於一

鄭氏園在縣西北馬鞍山前今海陵史君新創

陳氏北園在漳潭水竹寬潔亭館宏麗東浦黃簡

記徐聞詩書

盛氏依綠園在高墟

放生池在清真觀石千里書扁御筆有碑邑宰

項公澤跋

東禪寺後圃池上茅亭吳仁傑取杜詩可以賦新  
詩之句名曰可賦范石湖多遊息其中與陳壁廬  
申之皆有詩並見雜詠今廢

嵒山亭邑人趙善訓史君所居距馬鞍山之陽二百  
弓而限以小溪吳仁傑取元次山溪以名旌吾獨有

之句名曰晤山詳見所作詩序中今廢

玩芳亭邑人吳仁傑所居楊萬里陸游有詩見雜詠今廢

逸野堂邑人王僖所居僖以讀書自娛鄉里推重教其姪孫葆為名儒後廢其地即十六觀堂基云

友順堂邑人文節衛公涇之所居涇未貴時與兄弟日夕讀書其間其後功名各成尚於中招師教子姪寧宗宸翰書扁賜之

棲閑堂邑人龔昱所居昱識之耳孫陸游劉過有詩見雜詠

樂菴在縣東南六里圓明村侍御李衡歸老之地今為衡基所有詩見雜詠

四賢堂邑人李潘家潘之祖衡為御史時以論張說去國時正言王希呂亦言之直院周必大不草制給事中算濟不書黃皆因此去位莊治作四賢詩以美之詩見雜詠潘後訪求三賢遺像配以其祖置堂於其家名曰四賢

疊浪軒在馬鞍山北華藏教院下瞰湖濠一碧千頃詩人名公往觴詠於此今湖皆為田不復見舊觀或解扁字為車于水宜良田是其識云

### 異聞

異事世固有之前輩借以演史筆夷堅志之類也是或疑其好奇而未必皆實今本郡志參以近事姑載其畧不敢泛舉云

晉元康中吳郡婁縣懷珪家忽聞地中有犬聲視  
聲所自發有小穿大如演穴以杖刺之入數尺覺有  
物掘視得犬子雌雄各一目猶未開形大於常犬長  
老或云此為犀犬得之者富昌當養之以目未開  
還置穿中覆以磨礬宿昔發視失所在矣珪  
家亦無他

### 慧聚寺殿基見寺院門

後唐時慧聚寺紹明律師居半山彌勒閣一夕夢神  
人曰簷前古桐下有石天王像與銅鍾師宜知之詰  
旦掘地果獲此二物形制極古前輩嘗有詩云一  
旦石像欲發見先垂景夢鳴高岡皇朝咸平二  
年夏四月崑山縣漁婦李氏張魯河上得白龜如

錢大其色玉瑩電眸朱尾宮畫粲然婦取之歸  
授兒為戲又恐傷人縱於河頃之龜復在網如是  
者三恠之復棄去中夜岸有火熒往觀之龜在  
焉因取以歸近寺王道榮留龜置神像前失之  
私念此或靈物若虔禱當復見則必獻諸官忽  
自鼠竇中出精熒愈於前迺獻於縣令上之郡  
將陳省華異而神之具表以聞時蘇省華以  
白龜示之嘗作頌明年秋試進士崑山進白龜詩  
嘉祐中崑山縣海上有一船桅折風飄泊岸船中三  
十餘人衣冠如唐人見人皆慟哭語言書字皆不可  
曉行則相綴如雁行久之自出一書示人乃唐天祐中  
告授屯羅島首領陪戎尉又有一書乃上高麗者

時贊善大夫韓正彥為令召其人犒以酒食且為治  
其柅教以起倒之法各以手捧首而輾船中有麻子  
大如蓮的蘇人求種之初歲亦如蓮的次年漸小  
後只如中國麻子

翁謙掘地得青圭詳見寺院門

淳熙中崑山有一道人誦識云潮過夷亭出狀元  
李侍御以語知縣葉子強遂建問潮館于駟馬  
橋下後潮果過夷亭衛涇遂魁天下

九品觀堂晉朝石塔詳見寺院門

紹定中張廣平權縣事譙樓有巢鶴中戈帶箭  
造廷哀鳴若有所訴廣平視箭首字得戈人姓名  
追懲之鶴乃去

玉峰志卷下終



玉峰續志

山川

前志載崑山在華亭境而在崑山者乃馬鞍山其說已詳今以劉澄之楊州記考之謂婁縣有馬鞍山天將雨輒有雲來映比山山亦出雲應之乃大雨益信馬鞍山在崑山之的而山外之雲自相感召乃他山所未聞豈不為勝地乎

前志載吳松江三江口之說皆按古以驗今者若撫今而證古尚有說蓋江宗于海謂之江口當於海求之今大海自西甲分南北由轉料而西朱陳沙謂之揚子江口由徘徊而北黃魚垞謂之吳松江口由浮子門而上謂之錢塘

江口雖無三江口之總名而三江口之蹟顯然可考  
况揚子江下流属于浙錢塘吳松分隸蘇杭  
俱與震澤水勢相入實妄謂以海汭為三江  
以此三江為禹貢三江其說粗有攷於常昭  
姑錄之以質證於覽山川者

前志載陽城湖包湖傀儡三水合而為一今按其  
迹考之陽城湖在縣西北

里與

常熟接境南出尤涇真義浦

黃瀆浦通至和塘北自陸涇入傀儡蕩歸  
上元涇入于縣傀儡蕩去陽城有

里自尤涇朱昌涇南入大虞梁里浦通  
吳松江包湖乃巴湖又在西北

里

此三水勢脉雖相通中有支港貫穿其間然未嘗合為一也

前志載澱山湖在縣東南八十里今考證得水在華亭北岸屬本縣

前志載陳湖在縣西南七十里北自界浦渡頭浦入吳松江今考證得湖中有塗上有廟名三鄉埭蓋崑山吳江華亭三縣分界之處

前志載百家漾大駟漾在縣北里鰻鱖湖

在縣西北二十里昔皆深濶旱澇藉以漚溉今多成園所存不過白蕩僅存其名而百家漾大駟漾之迹併不可考矣

前志載新洋江在縣東南六里近年為渾潮壅

漲屢浚屢塞咸淳戊辰鄉貴象山陳令君明復  
嘗築堰于橋之南雖足以障渾潮之入而堰外泥  
積遇旱滯尚資通掘云

前志載小虞浦在西柵南出吳松江北通諸湖近  
年亦為渾潮漲塞咸淳戊辰郡守黃侍郎萬  
石嘗發錢置閘於嚴村灣之北初意障渾潮  
而瀦清水為費踰二萬定然閘去江遠且當港  
為啓閉不能殺渾潮外泥易滿加之潮浪衝啗屢  
至柵圯亦有抄沒廢寺田祖擬充脩治

前志載至和塘自縣西柵至界首二十七里近年壅  
塞尤甚咸淳戊辰鄉貴鄭開國疎嘗作小斗門  
于間潮館前欲障渾潮而亦無益若界首西至

夷亭九里地屬長洲本縣開浚所不及尤於民旅非  
便或謂於塘南曹涇界浦薦浦三港各立堰閘障  
斷渾潮則吳涇陸市浦諸港湖水不南下而東注  
日夕自浚不惟至和塘不塞而併利于小虞浦其  
議頗是然其間多邱第湖田每慮擦斷則湖水  
無泄恐致滄田而圍田於北湖者羽翼其說以沮  
撓殊不知置閘啓閉初無所害郡守黃侍郎萬石  
置小虞閘時嘗議及之將上其事於 朝省會黃  
公他除事遂寢數至而人出當有任事者又或謂  
此說終不可行則三歲湏一浚有能辦阡畝之租積  
三歲而興一役不科擾於田主不妨礙於莊舍以種  
田之佃鑿田頭之河事簡役平久而無弊此說不

獨可行於至和塘而近年所開河處皆可倣而行  
之姑錄芻蕘之言以俟後之采擇者

郡國誌載婁縣山下有巫咸故宅止言婁縣而不言  
何山按婁縣諸山今隸本縣者止馬鞍山無巫咸故  
宅之迹他如崑山之類分隸華亭者恐故宅在其  
下然考雲間誌亦不載此不知誌郡國者何所據  
而云姑錄以俟博古者問之

風俗

前志載之詳矣然皆全盛時氣象時異事殊巨家上  
室公私交困率多替徙市井蕭索如歲懺迎神雙  
林無礙會皆僅存其名而取鐙于郡与角觝觀潮  
等不復見矣然士風愈醇民俗素朴士以到訟庭  
登酒壚為恥民以務孝養勤本業為事心業  
有常古今如一則他邑所不如云

戶口

前志載主客共管戶肆萬伍千三百六十八口一十三萬四千五百可以稱壯邑矣今喻二十年切料為數未必增益益富者遷避貧者轉徙隅役既缺團甲多廢未從以攷其實恐貽虛增之誚姑仍其舊云



學校

前志載之六詳繼是則

間知縣袁璵創建直舍

且拘撥田租 拾

碩有畸咸淳間知縣林桂

發重修創尊道貴德兩祠于講堂東西移四賢

六先生祠增廣而崇奉之近者權縣謝公應考覈

頑佃包占之租申明臺府拘增一十 碩有畸又每

遇丁祭助以縣庫錢二百餘定酒三十餘斗及以縣

庫錢酒增賞堂補前名朔旦講書又率主簿趙

時日紆照禮經重飾俎豆六可見其加意學校然

自 朝廷創主學為專官遂分養士之半以供

官吏咸淳己巳知縣張復之始裁定主學俸給月

支省米一十九石更不支錢自訓導以下職事歲給

有差以校定分數為陞黜以殿謁丁祭為行實月輪  
前廊兼掌教養盡革前時紛紜之弊行之三年莫  
得而易六實與諸長上同所建明云

坊市

前志所載三十二坊僅踰二十年而廢者大半今書續創者于後

孝感坊在縣市片王坊內寶祐乙卯邑人曹椿年割股療母病知縣胡蔡白于郡守趙右司汝歷立坊以表之及借補椿年為承信郎節制司准使坊今不存扁藏于椿年家懸於安懷坊歲給米贍之

旌孝坊在縣市忠正坊北咸淳壬申六月邑人榮割股救母權縣謝公應照條支犒錢米仍具酒禮以鼓樂迎引是月建坊繼是又有張亦

剏股救母縣家如前表犒之

公字

縣衙已見前志繼是所修改者讀書堂改為清心堂

知縣陳紹方於堂後新

創一堂雄壯於前咸淳戊辰知縣林桂發創樂全堂於園內取前令張文定公所號以為名吳必大為記壬申權縣謝公應種竹其前尤清閤可受云

主簿廳已見前志淳祐己酉九年主簿吳堅創高士軒刻晦菴先生作同安簿事實于壁間寶祐甲寅主簿施丙創書院於西偏

尉司已見前志咸淳壬申縣尉於泰重修主  
學廳在縣學東北咸淳戊辰知縣林桂

發建

縣倉已見前志及於稅賦門載納苗之詳繼  
是十石以下苗亦赴府倉北倉遂無用每  
歲惟脩夾一兩教以納職租而隨收隨支亦  
無可久貯者

酒稅務已見前志自淳祐丙午知縣徐聞  
詩以坐賈抱稅及移酒庫歸縣司存遂廢  
僅存門廳務官權泊其中

贍兵酒庫在縣治東即近民館也自知縣徐  
聞詩移西務歸縣創清酒庫積改仍之後

歸郡家差官置吏始創名贍兵權不隸縣不可  
自縣治而入乃從近民館開門庫官就廨其帑揭  
以扁額遂為一司存後雖撲歸本縣而事體仍舊  
於是近民館松竹林皆不復為候賓讀書之所甚  
為創建者惜之

安懷坊已見前志原晉歲租五百餘石後為吏卒  
侵蠹不能續老者之食咸淳辛酉倉使董左司  
撲因坊老有詞行下本縣委寓士提督葺舊圖新  
量入為出今以百員為額終歲均得一飽始不孤  
前人安懷之本心云

本縣有戶部犒賞所酒庫已載前志此外尚有本  
府節制司酒庫如太倉巴城許務高墟各有一庫郡

帖差人措置月解徑詣郡於縣無預

稅賦

苗稅已見前後因 朝省派買公田常賦隨減今以重修  
明管催者列于後

秋苗額管五万四千四百五十七石二斗一升六合

內折苗二千七百單三石一斗二升三合

內糯苗三千九百二十二石一斗二升三合

內粳苗四万七千八百三十一石九斗七升

夏稅額管絹七千一百四十四疋丈一尺二寸

和買

綿 紬

役錢除派買田外續改撥積善鄉隸丞廳催充  
弓手庸錢今本縣額管催

### 丞廳管催

#### 課利

課利之取辦者酒稅也坐賈抱稅始自徐宰聞詩  
其後鄔秀實以長洲丞攝邑為東倅廳取以  
供月解力不能爭由是稅官具員而已若酒息  
則郡家歲撥折改粳苗一千一百五十餘石借充  
酒本以辦板帳以酒息多寡為月解虧足近年  
郡家不復借撥苗錢且酒庫事權屬郡縣者不  
定所趨不足以供所解罄空而辦官吏難之解  
發之數則見前志今亦大同小異有增無損



官租

園管等田已載前志景定甲子 朝省派買浙郡公田  
本縣所買 十 万 千 百 一 十 畝租額斗器  
各隨朝差職事官分司各州任其事始差莊官  
催運繼改上戶承佃又置催租官以為屬近俾憲  
臺兼同提領官田所遂省分司及催租官而撥  
還本府填苗額者為田 千 百 十 畝則  
肆郡家自催若東鄉墾地為田租則景定間  
知縣陳紹芳之所考覈為田 畝  
六肆郡家云

令佐題名

縣令題名已載前志今以項公宰而後者載於此

而丞簿尉主學則以各廳壁記錄入虛其後以俟  
續書云

知縣

項公澤

樓炳

胡蔡

袁璵

李燾

何處寬

何九齡

楊盍

陳紹芳

林桂發

張復之

楊源

縣丞

樓璠

郭琚

吳洵仁

孟鎰

向準

宋彥振

歐陽伏世

何浚明

王幹

向子廣

盛簡脩

劉嶷

洪峽

李耆俊

莫俱

趙善待

刑銖

晏解

李稷

呂察問

謝深甫

趙善稼

樓鉉

李津

趙盛

范公寧

陳蕃孫

黃博文

趙希侔

趙師晃

張傳霖

翟彬

蔡汝揆

紀極

范大雅

張廣年

趙師法

高衍孫

秦鉉

萬保先

蔡汝弼

趙樵

張本

趙澂夫

林靖之

主簿

郭正仲

俞遠

蔣誼

趙師雲

陳璧

趙希懋

余申

張餘慶

李堅

項稚賓

湯遇

王顯宗

趙希璠

張飛卿

呂宗元

趙若璠

唐震龍

吳堅

施丙

何垓

丁鑒

陳大用

趙崇瀾

逮夢龍

趙崇台

趙時羈

縣尉

施廣勤

王齊興

王萬樞

顏光道

趙伯方

仲度遠

趙明夫

馮必度

陳子冲

葛洪

曹溥

強遵

余瑒

趙希奭

程渙

應泰之

安輿

姚洽

王友輔

尹彦仁

洪起宗

朱

鄒宗俊

郁良顯

張宗已

趙汝欽

柳開

潘應申

陳肖孫

趙汝案

俞煒

李振之

富宗礼

沈起潜

吳登龍

譙

葉

趙孟玳

於泰

主學

倪龍躍

包應許

戴成大

名宦

自梁以來已載前志然葛洪嘗為尉謝深甫嘗為丞  
俱有政績後登廊廟此則前志失於紀載者也事  
具國史不復重錄自壬子以後若項若吳今則脩入去  
項公澤字德潤永嘉人淳祐間自長洲丞辟宰  
崑山崑宰自李枕滿秩後更十三任不以善  
去公澤由童科擢第以文學飭吏事留意  
學校買田養士為政廉敏百廢具舉凡所

增創分載前志詳見生祠記秩滿造朝嘗丞國子宗正知安吉州今淹家食見謂未足以盡其才云

吳堅字彥愷天台人淳祐中為簿留意教養詣學講肄無虛日遵晦菴先生簿同安之法以厚風俗正人倫明義利闢姦邪為先務有所增創分見前志嘗登畿歷清要位文昌躋瑣闥今以雜學士奉祠

### 進士題名

前志已載進士百二十有八今自文天祥榜續列于後

寶祐四年文天祥榜

遼雲遇龍光應井子

王體文堯章上舍

開慶元年周震炎榜

林文龍用雨

景定三年方山京榜

凌萬頃升度

張熹子明

咸淳元年阮登炳榜

郁紹定

高烈和父上舍釋褐

人物

自晉以來已見前志然上有所闕遺如龔立道之有文有學安貧樂道鄉人稱為龔山長名公賦詠多載雜詠名不逮才識者惜之前志僅於龔默甫之下書曰昱馬少伊文筆鳴一時嘗司金耀

勇退家食以觴詠自樂號曰得閒前志僅於馬伯忠之下書曰光覺紹興進士范良遂次卿事井剛為兄而文學過之筆研不靈卜築江上且耕且讀書與學俱饒自號墨莊有詩集刊于家吳荆溪為序前志併泯其名而僅於井剛之下書曰姪慶家：次卿子也陳正父為端平名執政垂大拜而薨于位事固已載國史而前志畧不及其一二衛清井易名文節而前志書曰文穆李彥平達於生死前志載其作手書遍別親友戒其子毋作佛事而不書其問天色何時家人答以月明條然而逝是時寔同秉志筆由今而觀誰執其咎



不當以筆之不專而自恕也至若失於記載或載而未詳者今則裒類增入併自序實之世系於諸老先生之後云

張匯字朝宗其先濮人文潞公諸壽雋為洛陽耆英會有龍圖閣直學士張素即匯之祖也匯當南渡初五為浙漕時宰臣開督府分道遣兵詔匯隨庫應副不限以路匯歷江淮歸浙建臺玉峯因家焉嘗卿棘寺以刑清得詔有昧好生之德行寬大之書之語其家今藏此詔後游歷麾節終於中大夫直寶文閣由其子孫為崑山人文脉至今不墜云

劉過字改之自號龍洲本廬陵人客崑山  
依妻家而居過為人尚氣喜飲酒為詞章  
豪放英特如斗酒彘肩風雨渡江豈不快哉  
等詞皆行於世至扣關一書請 光皇過  
宮言極剴切尤諸公所稱許死塋於馬鞍  
山東齋之西岡陳止安誌其墓其後詩人即  
東齋為祠每暮春縣官率士友酌祠下二  
卿湯 中嘗作文遣祭及騷人墨  
客吊詠甚多俱留祠壁邑人呂大中嘗裒諸  
詩作楚此二遺音行於世

陳震字震亨其先古靈之後父遵來贅李  
樂菴之女遂家于崑山振幼孤而貧遵

死無以葬得片地于縣南六里之圓明卜者  
謂葬則不利於長子、即振也振曰使親藏  
得寧或不利於某則二弟尚可為主祭乃  
即其地以葬後振為紹熙進士歷朝把麾  
弟拱六登端平科陰陽家遂指此地墓為  
邑地最吉振天性至孝而祿不逮養刻木  
以祀一飯必先祭鄉人尤以此稱之工於作文而  
詩詞尤高雅好楷書雖小簡隻字亦不草  
人傳為式至今愛之居鄉急義樂善好  
汲引後進然有過失者未嘗不規之以正仕至  
太府寺丞歷知永瑞州以朝議大夫致仕自  
號止安居士有文集五十卷行于世子昌世

繼有文聲尤優吏事由太府丞知信州以吏  
郎召陞見之日 穆陵有一廉可喜之褒後  
知瑞州終朝散大夫昌世中年後即絕欲自奉  
極澹薄故自號澹軒居官所至有遺愛皆  
以節用愛人為本家非甚有餘粟而每於  
貴糴之時損直濟民鄉人德之子師尹明復  
俱紹先烈明復宰象山垂四年士民嘗借留  
當路以達于朝師尹亦通閩籍顯揚未艾識者  
謂其後必大云

鄭準字器先本開封人華原郡王之諸孫祖父皆  
寓居崑山準由蔭補魁銓闈登慶元進士第  
歷仕知袁州終於中奉大夫準生長王侯家氣

象如儒素薄於功名厚於道義輕財好客赴人之急如已尤加意嫻族髣髴范文正公義莊之意買田給贍至今其子孫仍之不替子孺今守高郵自試吏至典藩所至以廉稱行報郡最顯達未量姪疎嘗知泰邵韶三州今以奉直大夫奉祠里居尤謙和樂易不与物忤未嘗見其疾声遽色人以吉人許之年開八袞福壽未艾諸子俱俊敏能官其後將益昌云

趙絳字君善丞相忠簡公之曾孫父監來贅范端明之女兄因家焉監終於知興國軍絳讀書好學至老不倦而謙恭退然真世所謂吉人者蚤由上庠登第歷官宗正丞都官郎官

理皇嘗謂執政曰好一諫官有沮之者出知吉州不上賦祠官祿六年遂挂冠除直秘閣進直寶章以朝散大夫終七十八自號頓菴又號如舟清修寡慾室無妾媵家乏於財非若歷朝把麾者惟藏書萬卷手自校讐則人所難有未死數年前嘗自誌其墓死前一夕尚領賓論文是夜洞瀉次早脩然而逝後有人夢其旌旗簫樂導騎甚都疑為仙班中人使其果然亦平日為善之報子序孫懃俱世其賢

王圭字君玉本安吉人父邁來贅崑山因家焉邁登乾道第終通判太平州邁死圭幼忍貧力學孝於其母登嘉定進士主松陽簿就為

令行經界井、有條不惟當時便之至今版繪其式  
制行於天下為經界者準則後知常州入為司封郎  
官終朝散大夫自號靜觀有文集 十卷存于  
家其居官廉家無餘貲死無以殮子敏學強學  
俱以圭蔭歷任六廉謹云

劉必成字與謀居邑之湓浦其先福安人必成少游京庠  
即馳雋聲嘉熙丁酉有七士同扣閤極言時事必成  
寔為之倡是年七士計偕而必成為武舉解魁戊  
戌遂魁天下己酉嘗中鎖廳蓋以文武全才自負  
者嘗入閣舍兩輪陛對慷慨言邊事援古證今  
玉音褒獎次日宣諭宰執謂劉某所言極好其  
後俱見於用歷守清潯終於湖南副帥自號愛

開翁有三分詩藁行於世

自序昔在帝嚳以木德為高辛帝次妃簡狄生契  
契以功封於商賜姓子氏裔孫成湯為商興王至  
二十九世帝乙生微子啓周封於宋其地睢陽是也  
自微子傳國<sup>三</sup>世為平公名成生御戎字子邊其  
孫卬以王父之字為氏左傳昭公二十二年宋以邊  
卬為大司徒自是始有邊姓其後分見於漢晉隋  
唐五代迨乎我朝世不乏人而所居不一居薊門者  
澶州刺史退思生戶部尚書歸謹居太原者中  
武節度嗣生御史中丞光範惟居楚丘者則出  
於陳留。之有邊氏自韶始韶自號經筵讓  
進以文才詩書之澤所源委也韶讓而下其名



字之可考者由景祐至于今凡十有三世景祐生徽  
徽生延肇：生忠告忠恕忠告登漢乾祐高科  
作周顯德循吏贈礼部侍郎生肅雍俱登進士  
第肅為咸平景德名臣一時人才號為二十四  
氣者肅居其首國史有傳澶淵之役肅時守邢  
內則地震地隳牌榜不具外則角鳴梯舞鄰壤  
已破乃以孤城死守折筭誓天而家人訣至密詔  
令便宜擇利六匿不宣布令詔書石刻子孫猶  
藏焉卒全一城俘獲千計而鎮魏深趙滋洛六郡  
築門堅壁民流城下開門受納來者如歸其  
所全活十萬餘人及戎人請盟璽書趣召便殿  
賜對超拜樞密直學士勒名勲臣行且柄用

以諛左遷遂成齋志肅生調登景祐第仕仁  
宗朝嘗上書訟父寃贈肅為兵部尚書調終於福  
建轉運使贈開府儀同三司生瑀球珣珉琦而所  
居分為三派國子博士瑀居毗陵中散大夫球將  
作監簿琦居開封朝奉大夫珣太子中舍珉居  
姑蘇中散監簿而下中原亂離譜牒無傳居  
蘇常者圖系可考其續世科者常則有察密  
烈蘇則有知章知白：仗節使虜聞欲寇蜀  
歌蜀道難以諷由是虜輒西南之役歸式天官  
興貢舉卒贈少師范石湖志吳郡嘗載入人物  
門珉生靜贈承事郎靜生惇德竭居于崑已  
見前志生隆深瀛況濟深況蚤卒隆瀛詞翰

學行表：一鄉濟幼孤鞠於諸兄志學好脩里  
閭稱為吉人暮年以子為進士該慶典拜初  
品官濟生應升應登明經作賦聯翩鄉書陳  
止安指為籛金邈氏書脉自此復振應登早  
世應升為實先君子自少顓悟力學自奮重  
然諾寡言笑於倫紀備盡不取一毫非義之財規  
行矩步真得四非之戒者鄉士師式學子諄然有  
成陳簣窓王脩齋皆其座主周山房盧蒲江衛  
後樂教瞿菴曹東剛陳習菴蔣實齋諸老先生  
皆所器重不惟許其文筆而每與人言必指操行  
為可敬豈料食太官祿曾不踰年而終實昆仲凡  
三皆先君子自訓迪未嘗他有北面專門業經

父子師友人指邇氏為讀書之最以是伯氏明六以  
戴經連捧三薦見侯試南宮仲氏雲遇以伏經  
魁乙卯鄉舉登丙辰乙科方仕于時獨實无似  
庚午垂預解額以次篇寫題一字之側考官破  
法標出人甚惜之實自安于命而已然顯揚之望  
此念惕焉退念鄉邦書脉不絕如縷何敢盡諉於  
氣數有能作而起之使百年文物復還旧觀吾儕  
有子或可為箕裘之紹推原譜系讀祖父未盡  
之書獲恥於鄉人之列則中原衣冠不至漸絕不  
然深有可惧者焉實不自揆二十年前嘗同執  
志筆緬想旧事恍然如夢<sup>更</sup>二十年未知又在何  
處自序先世之始末以識之而屬攝令 玉淵

以書先諱云

封爵

自吳以來已見前志今以續封者列于後

鄭竦 奉直大夫封崑山縣開國男

寺觀

前志載國一禪師道欽受業於景德寺國一禪師者姓朱氏崑山人元素禪師為之祝髮授李兩元素別戒之曰汝乘流即行逢徑即止欽後至臨安見東北一山秀出樵夫曰此徑山也欽遂居之為開山禪宗嘗入內庭得師號云

前志載慧聚寺殿柱雷火篆書悉熱於淳

熙之火而不載雷篆云何今老通鑑紀事本末則云慧聚寺大殿二柱有天書如今之大篆非刊刻者一勣溪火三字一蜿蜒蟠結若符篆而不可考在柱裏向人所不見字大小近尺許好事者或模印之今併錄於此今寺山門兩廊稍脩於前邑士邊明嘗作大殿記向全盛時寺僧星居凡八十餘房五百餘僧今房廢僧少不及三分之一云

永懷報德禪院已載前志院有諸天閣相傳僧翟道川為尉卒時縱囚賊使歸及道川募緣建閣至海上与賊遇與之巨筏遂以建閣范浩為閣記却不載此說咸淳辛未寺廊遭回祿

火勢屢及閣而屢止或謂道川願力之重所以能保全云

惠嚴禪院已載前志自如說去後主非其人至與捨田家不肖子盜賣院租事至有司郡守黃侍郎万石改撥為咸淳閘閘浚用欲拆廢院鄉寓鄭開國竦念此寺之創出於其乃伯知郡益之意力白於郡乃得復存止易院額為咸淳菴以其先世元捨田租八十石專奉鄭氏香火所撥隸閘局米仍收貯院廊相傳開山祖僧坐亡埋於方丈後數十年曾發視儼然如生而手指甲反長於生前六異事云

寶慶院十六觀堂方修志時略無廢壞不數年

殿堂佛像下至庖湍蕩無片瓦計其興不滿二  
十年殊不可曉今其地歸城中北寺前志載其  
地本逸野堂故基其實非也

薦嚴資福禪寺已載前志成淳

主僧道

元募緣創七石塔於寺門之南吳移屋三楹  
於東南歆以障陰陽所謂巽風雨其規摹室  
塞彼謂歆氣聚而識者未然之

東齊已見前志六嘗載僧道川駐錫之地今考  
乃弓手翟超以勇力名被差捕賊宿土山卜  
將軍廟下忽有所悟徑投東齊為僧遍遊江湖  
間道遇虎不為動虎亦馴伏其旁一日大書四  
句云我有一條鐵柳標縱橫妙用無人識臨行



撥轉上頭關。轉起一聲春。霹靂危坐脫去。  
其徒法金六崑山人號無菴。嘗行惠應廟前。  
以首觸柱云。有所得。旁觀者見其精采烜然。  
而全不自覺。後為名僧云。

玉虛道院在縣西南卜山下。本月華道堂道人陳正真草創。以館雲游咸淳

邑民徹

而新之。以奉真武。請於禮部得玉虛為額。奉  
吏部陳澹軒像於旁。近又創北斗梓潼魁  
星祠于其中。

廣孝寺已載前志。始者甲乙住持。繼因僧徒紛  
擾。朝省更為十方教寺。及觀嘗楞嚴子  
院悉併歸寺云。

衍慶薦福院已載前志繼是邑寓衛司今指  
請為乃祖文節公功德寺勅賜今額主僧師仰  
創建甚多

祠廟

尊道祠在明倫堂之東先是淳祐辛丑朝旨  
州縣學各建六先生三祠崑學止建繪濂溪  
伊川明道晦菴橫渠南軒之像於從祀壁間  
至己酉權令吳堅始建祠于東廡咸淳丁卯  
知縣林桂發重修縣學增祀事康節涑水東萊  
共為九人移其祠於堂東扁以今名

貴德祠在縣學明倫堂之西淳祐己酉權令  
吳堅建六先生祠遂祠陸龜蒙張方平范

仲淹李衡名先賢祠與陸先生祠對峙咸淳丁卯邑令林桂發重修縣學移張方平於守令祠增事范成大衛涇陳振共為六人祠於堂西扁以今名仍與六先生祠相對

惠應廟已載前志繼是間加昭德妃加

寶祐間加靈感妃加改封靈祐將軍為武

信侯近者邑人有請欲申八字之號有已覈

實奏審行錫徽封云

祠山廟在永懷寺已載前志廟貌踰百年咸淳辛未秋孟五夜火寺皆不焚獨殿宇像貌頃刻焚盡今見議重創

巫侯祠已載前志寶祐癸丑邑士不忘項公澤

之教養嘗創祠於學与此祠對峙咸淳丁卯  
知縣林桂發重脩縣學遂併一祠及其畢  
工又增祠桂發與郡守黃侍郎万石繼以賢  
守令祠

園亭

鄭氏園已載前志繼是史君創退耕堂水竹環  
茂可容數十客樗寮張即之為書葉  
丞相又為書園廳之扁曰玉峰佳處園內西南  
又有道院庭植落花數百本吳中所無花時史  
君領客觴詠其間留題甚多

陳氏園在縣東

後歸澹軒陳史君恕齋洪瑞明嘗扁以四

時佳景澹軒之子師尹號石岩增創寬潔有  
堂曰光風霽月與鄭園退耕不相上下

四賢堂已見前志君子之澤不能五世堂隨宅售  
像不復設幸其孫桂高能文好學取四賢繪像  
藏于家

喜廉堂在邑人吏部昌世家  
為郎入對天語聞卿一廉可

其堂

承訓堂在邑人鄭史君準家  
葺而居之蓋其不墜先

云

止足堂 邑人鄭史君

宦游

義以

相

傳

石明復

多令君嘗刊

祖父清白相之義以為

玉峰續志卷終

向時東城顧氏書未散時書友錢聽默  
謂余曰有視校手書志書一部在不  
知何房亦收書勿遺矣其時聽默  
未暇書名二冊未言其房也蓋東城  
顧氏有三家一駱龍卷一任應麟一混  
堂卷余牛也晚駱龍卷一書久散  
余所收收者時零而已混堂任應麟兩家  
才有志書向余與顧氏仲得諸最夥  
此三卷若續志出混堂卷余得此時

向來識見誰何者  
後校書郎  
余借於余懷及而言  
輒回年以質諸友  
卷之謂此書法小  
余紙不辨并書數  
語以誌是書向無  
人福及之余得此  
友之稱隨居後校  
書郎中  
而初年不如此  
視  
又散諸他  
余  
世  
副  
本  
校  
卷  
初  
海  
年  
山  
傳  
錄  
此  
本  
之  
印  
中  
夏  
重  
壯  
裝  
因  
記

宋重刊一公





宋人著述此書外又有崑山雜詠  
宋初精妙二本東坡所藏白牋小讀  
書堆之入從福氣云云書余多教  
十年來神物存此無定所可石版印

印中伏

卷五

意之有藏書家二丑秋來送老送女  
地有快若木秀才邀系披覽古籍教中  
最難者為宋家之字校嚴周晉公集宋  
直百二系以書直估之遷延三載迫與犀

書牒部中、兩接、卷、兩接、古本、お、名  
白、外、部、志、其、和、宋、官、一、校、本、為、至、有  
也、附、記、二、此、

是、名、也、